



Sumáriu Kazu
Tribunál Judisiál Primeira Instánsia Oekusi
Janeiru 2024

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instánsia Oekusi

1. Total kazu ne'ebé JSMP monitoriza: 7¹

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	3
Artigu 154 (KP)	Maus-tratus ba kónjuje	1
Artigu 316 (KP)	Kontrabandu	3
Total		7

2. Totál desizaun ne'ebé JSMP monitoriza : 1

Tipu Desizaun	Artigu	Númeru
Pena multa	Artigu 67 KP	1
Total		1

3. Total kazu sira ne'ebé kontinua prosesu tuir JSMP nia monitorizasaun : 1

B. Deskrisaun sumáriu julgamentu ba desizaun kazu

1. Krime ofensa ba integridade fízika simples ho natureza violénsia doméstika

¹ Total kazu ne'ebé JSMP monitoriza la representa total kazu ne'ebé tribunál julga

Nú. Prosesu : 0007/23. OEPMK
Kompozisaun Tribunál : Singulár
Juis : Dr. Argentinho Luisa Nunes
Prokuradór : Dr. Mateus Nesi
Defeza : Dr. Calisto Tout
Desizaun : Pena multa US\$67.50

Iha 24 Janeiro 2024, Tribunál Judisiál Primeira Instánsia Oekusi prezide leitura sentensa ba krime ofensa ba integridade fízika simples ho natureza violénsia doméstika (VD) ne'ebé envolve arguidu MNL hasoru nia inan, iha Regiaun Administrativu Espesiál Oekusi Ambeno (RAEOA).

Akuzasaun Prokuradór

Prokuradór akuza katak Iha 09 Fevereiro 2023, maizumenus iha oras tuku 19:00 kalan, arguidu ho lezada diskute malu kona-ba hahan kalan ne'ebé seidak prepara, nune'e arguidu foti ai-pedasuk rohan ida hodi tuda lezada no kona iha lezada nia matan-fukun parte loos rezulta kanek ki'ik no bubu. Depoisde akontesimentu ne'e, lezada ba apresenta kedas keixa iha OPS (Ofisiál Polísia Suku). Kazu ne'e aneksa hamutuk ho relatóriu médiku hosi Ospital Referral Oekusi no fotografia sira hosi polísia VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 prizaun ka multa, konjuga ho artigu 2, 3(c), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira ne'ebé hakerek iha akuzasaun no deklarata katak arrepende ninia hahalok. Arguidu mós deklarata katak depoisde akontesimentu ne'e, arguidu monu ain ba lezada ho tais fetu ida no husu deskulpa ba lezada. Arguidu hatutan katak foin primeiravés halo krime hasoru lezada no mai hatan iha tribunál. Arguidu konsidera katak hahalok violénsia hanesan ne'e ladi'ak no kontra lei nune'e arguidu promete sei la repete hikas hahalok ne'e iha futuru. Liután arguidu hatutan katak nia serbisu hanesan to'os na'in nune'e laiha rendimentu fiksi kada fulan, sei klosan, hela hamutuk ho lezada no iha dependénsia ekonomia ba malu.

Alende ne'e, lezada kontinua konfirma faktu sira iha akuzasaun no konfirma ho deklarasaun arguidu nian katak depoisde akontesimentu ne'e liu tiha semana ida, arguidu monu ain ba lezada no husu deskulpa ho tais fetu ida tuir kultura Timor nian. Lezada mós deklarata katak sira dame malu ona no kontinua hela hamutuk nafatin iha uma ida.

Alegasaun finál

Prokuradór konsidera arguidu provadu prátika krime tuir faktu sira iha akuzasaun bazeia ba konfisaun arguidu nian no konfirmasaun hosi lezada. Alende ne'e, prokuradór mós argumenta katak krime VD barak liu akontese iha Regiaun Oekusi kompara ho munisípiu sira seluk no iha kazu ida ne'e arguidu komete violénsia hasoru nia inan ne'ebé tuir loloos arguidu mak tenke fó seguransa di'ak ba nia inan hosi kualkér aktu

sira. Tanba ne'e, husu ba tribunál atu aplika pena prizaun fulan tolu suspende ba fulan neen.

Entretantu defeza husu ba tribunál atu aplika pena ne'ebé kmaan ba arguidu tanba arguidu deklara ho onestu, arrepende ninia hahalok, monu ain ona ba lezada ho tais feto ida no husu ona deskulpa ba lezada. Alende ne'e, konsidera katak arguidu mós foin primeiravés halo krime hasoru lezada no mai hatan iha tribunál, di'ak malu ona, promete sei la repete hikas hahalok ne'e iha futuru, serbisu hanesan to'os na'in nune'e laiha rendimentu fiksi kada fulan no arguidu hela hamutuk ho nia inan (lezada) no iha dependénsia ekonomia ba malu.

Desizaun

Depoisde avalia faktu hotu, tribunál prova katak arguidu uza ai-pedasuk rohan ida no tuda kona iha lezada nia matan-fukun parte loos rezulta kanek ki'ik no bubu.

Bazeia ba faktu provadu sira ne'e no tetu mós ho sirkunstánsia hotu-hotu (agravante sira no atenuante sira), tribunál konklui prosesu ne'e no kondena arguidu ho pena multa US\$67.50, ne'ebé kada loron arguidu sei selu 0,75 durante loron 90. Tribunál mós fiksa pena alternativa loron 60 iha prizaun, bainhira arguidu la kumpri pena multa refere.

Atu hetan informasaun kompleitu, favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Telefone: (+670) 33238883 | 77040735
Website: <https://jsmp.tl>
info@jsmp.tl